



Knud Kristiansen aamma Gerhardt Petersen  
Inatsisartunut ilaasortat  
/maani

**RAL A/S-imi assartuinnermi akigititat naleqqussarneri pillugit § 37  
tunngavigalugu apequtitut akissutit**

10-03-2014  
Sags nr. 2014-096512  
Dok. nr. 1495056

Apequtissinnut qujanaq. Tulliuttumi akineqarput:

Postboks 1160  
Tlf: 34 50 00  
Fax: 34 55 05  
3900 Nuuk  
Email: pan@nanoq.gl  
www.naalakkersuisut.gl

**1. Ukioq manna 5 procent-imik aappaagulu 5 procent-imik assartuinnermut akit  
qaffanneqarnissaasa saniatigut inuiaqatigiinnut allatigut  
eqquisoqannginnissaa Naalakkersuisut qanoq iliorlutik qulakkeerniassavaat?**

Assartuinnermi akigititat 2015-mi jaanuarip aallaqqaataani 5 procentimik qaffassanersut aalajangiisoqanngilaq. RAL-imi siulersuisut usit annertussusaat piviusunngortinneqartut naatsorsuutigineqartullu tunuliaqutaralugit 2015 pillugu aningaasaqarnikkut angusassat pitsaanerulersinnissaannut pisariaqartitatut naatsorsuutigisanik misissuineq kingusinnerpaamik 2014-mi novembarip aallaqqaataani nassitussavaat. Tassani aamma sipaarutissanut siunnersuutinik siulersuisut saqqummiussissapput. Usit annertussusissaattut naatsorsuutigisat kiisalu sipaarutissatut siunnersuutigisat tunuliaqutaralugit naleqqussakkamik qaffaanissamut Naalakkersuisut isummissapput, RAL-ip umiarsuassaasa nutaat sanaartornerinut aningaasalersuisusaaq taarsigassarsinermik isumaqatigiisummi piumasaaqatit aamma 2015-mi eqqortinneqarnissaat eqqarsaatigalugit.

2014-mi assartuinnermi akigititanik qaffaaneq RAL-ip taarsigassarsilluni isumaqatigiisutaani piumasaaqatit eqqortinnissaannut pisariaqarpoq. 2015-imi assartuinnermi akigititat qaffannissaat sapinngisamik appasissumiinnissaa anguniarlugu allanik periarfissaqarnera, tassunga ilanngullugu RAL-imi sipaarfiusinnaasut periarfissat, misissornerneqarnissaat Naalakkersuisunit qulakkeerusunneqarput.

Aaqqiissutissatut siunnersuutigineqartoq aamma 10 procentimik qaffaanissaq pillugu RAL-ip qinnutigisaanut atatillugu isigineqassaaq. Innuttaasut eqqarsaatigalugit aamma RAL-ip aningaasaqarnera eqqarsaatigalugu periusissaq toqqarneqarpoq.

**2. Assartuinnermut akit qaffanneqarnissaat pinngitsoortinniarlugit RAL-ip ilumini  
pisariillisaaneq aammalu sipaarniarneq aqqutigeqqaarsimaneraat pillugu  
akissutisiarput naammaginatsumik matussusiinngilaq. Matumuuna RAL-ip  
pisariillisaanerit sipaarniarnerillu ilumini iliuuserisimasai pillugit  
erseqqissumik nassuiaammik piumasaaqateqarpugut aammalu  
minnerunngitsumik siunissaq eqqarsaatigalugu ingerlatseqatigiiffimmu  
tunngatillugu pilersaarutigineqartut ilanngunneqassasut kissaatigaarput.**

Akuersissummi pisussaaffiit ilai akiginagit RAL 2009-2013-mi 50 million koruunit sinnerlugit ingerlallualersitsillunilu pisariillisaasimavoq. Pitsanngorsaanneri iluanaarutit suliniutigut assigiinngitsorpassuartigut anguneqarput:

- Ikummatissatigut atuinerup pitsaanerulersinnera: 10 million koruunit missaat (2010-2013)
- Pisiniartarnerit pitsaanerulersinneri: 5 million koruunit missaat (2011-2013)
- Ukiut tallimat ingerlaneranni sulisut ikilisinneri (1. jan 2009 - 31. december 2013):. Sulisut 100-it missaat (ulloq naallugu sulisut agguaqatigiissillugit). 24 million koruunit missaat.
  - Pitsanngorsaalluni iluanaarutini sulisutigut sipaarutit pingaarnertigut tassaapput:
    - Umiarsuarni inuttat: 11 million koruunit missaat
    - Akunermusiaqartut akornanni pisariillisaanerit (Kalaallit Nunaanni aamma Danmarkimi): 12 million koruunit missaat
    - Atorfillit: 1 million (Kalaallit Nunaanni aamma Danmarkimi)
- Allatigut umiarsuarni aningaasartuutit (amutsivimmiinnerit, iluarsaassinerit il.il.) 3,5 million koruunit missaat
- Containerinut immikkoortitat: 1,5 million koruunit missaat
- Saffiorfinni pisariillisaanerit: 3 millionit missaat
- Pitsanngorsaanerit allat (aningaasat annikitsorpassuit arlaliupput): 6 million koruunit missaat

2013-imiinnaq 20 millioninut RAL pisariillisaagaluartoq peqatigisaanillu 2014-mi assartuineri akigitat 5 procentimik qaffanneqaraluartut 2013-mi kaaviiartitat 58 millioninik apparnerisa kingunerisaannik sinneqartoorutit suli annertunerusumik pitsanngortinnissaat pisariaqarpoq, umiarsuit nutaat aningaasalersornerinut atatillugu taarsigassarsisisup piunasaqaataanut RAL naammassinnissappat.

Septembari 2013-mi ingerlatseqatigiiffimmit taamaaliluni 2014-mi naammassineqartussat pitsanngorsaanneri iluanaarutissat suli arlallit nassaarineqarput. Sipaarnerit taakku qanoq psiviusunngortinneqassanersut maannakkut siulersuisuni qullersaqarfimmilu suliarineqarput. Unammillersinnaassuseq eqqarsaatigalugu, kisianni aamma sulisut eqqarsaatigalugit taamaattumik suli tamanna qanoq piviusunngortinneqassanersoq ilisimatitsissutigissallugu siusippallaarpoq.

### **3. Assartuineri akinik qaffaaneq kingunerisinnaasai pillugit misissueqqissaarneq qaqugu tamanut takussutissiarineqassava?**

10 procentimik assartuineri akigitat qaffanneqarnissaat pillugu RAL-ip qinnuteqaataanik suliarinninnermut atatillugu periarfissaasinnaasut allat RAL suleqatigalugu Namminersorlutik Oqartussani suliarineqarput. Peqatigisaanik taakku kingunissai misissoqqissaarneqarlutik. Periarfissaasinnaasut Naalakkersuisunut saqqummiunneqarput, 2014-mi 5 procentimik qaffaanermik aaqiineq kiisalu 2015-mi naleqqussaaniisaq akuerineqarluni.

Taakku saniatigut Naatsorsueqqissaartarfik suleqatigalugu Namminersorlutik Oqartussat Naatsorsueqqissaartarfimmi akitigut akissarsiatigullu naleqqersuutit naatsorsornerinut assartuineri akigitat qaffanneri qanoq kinguneqassanersut misissoqqissaarneqarpoq. Misissueqqissaarneq taanna assartuineri akigitat

qaffannerisa kingunerinik inuiaqatigiit ataatsimut akilersinnaassusiannik misissuinermut ilaajumaarpoq, oktobari 2014-mi naammassineqartussa.

**4. Pissutsit qanoq ittut qulakkeersinnaavaat inuiaqatigiit aammalu inuiaqatigiinni inuussutissarsiornermik ingerlataqartut assartuinermi akit qaffanneqarnerisa saniatigut annertunerusumik eqqorneqassanngippata?**

2015-imi assartuinermi akigititat qaffannissaat pinngitsoortinniarlugu RAL-mi ingerlatsinermi angusat pitsaanerulersinneqassapput akiliisinnaassuserlu suli qaffasissumiitinneqarluni. Tassani pisariaqarpoq maannakkut misissueqqissaarnerit takutitaannit annertunerusumik usit annertussusaasa qaffannissaat imaluunniit RAL pisariillisaalluni sipaaruteqarlunilu.

Siunissami ungasinnerusuni assartuinermi akigititat qaffattariaqarnerat appasissumiitinniarlugu RAL-ip aningaasaqarnera Naalackersuisunit malinnaaffigeqqissaarneqarpoq, suliffeqarfiullu ingerlaavartumik pisariillisaanissaa Naalackersuisunit qulakkeerneqarluni.

**5. 2013-mi ukiup affaani siullermi RAL-ip naatsorsuutaasa 3. September 2013-mi tamanut saqqummertumi takussutissaqarpoq pissutissaqartoq aarlerissalluni 2013-mi ukioq naatsorsuusiorfik RAL-imut kingumut pitsaanngitsumik kinguneqassasoq (Akileraarut suil ilanngaatinagagu minus 59,7 mio. kr.). RAL-ip ataatsimeersuarnissaanut RAL-imut piumasaqaatigineqartussat Naalackersuisut suut saqqummiutissamaarpat, aammalu piffissap imaalinerani angusaqarnerlussimanermik aallaaveqarluni naatsorsuutit akitsuinikkut eqquereernerup qaavatigut akitsuisariaqalernermik inuiaqatigiinnik eqquisoqassanngitsoq Naalackersuisut qularnaatsumik neriorsuutigisinnaavaat?**

Piginnittuuneq Naalackersuisut Siulittaasuata Naalackersuisoqarfianit isumagineqarmat apeqqut taanna Naalackersuisut Siulittaasuata Naalackersuisoqarfianit akineqarpoq, tassanngaanniillu ima ilisimatitsisoqarluni:

RAL-imi ineriartorneq Naalackersuisunit malinnaaffigeqqissaarneqarpoq. Paasinarpoq usit annertussusaasa apparnerisa kingunerisaanik 2013 ingerlatseqatigiiffimmut ukioq ajortuusimasoq. Soorlu ilisimaneqartut usit annertussusaasa annertuumik apparnerinut taarsiutitut assartuinermi akigititat siullermik 5 %-imik qaffannissat Naalackersuisut aalajangeeqqammerput.

Naalackersuisut soorunami neriupput assartuinermi akigititat qaffaqinnissaat pisariaqassanngitsoq, kisiannili paasillugu usit annertussusaat appariartuinnarpata aamma RAL pisariillisaaqissinnaanngippat taava assartuinermi akigititat qaffannerat pisariaqartuusimassasoq.

Neriuppunga apeqqutissinnut qulaaniittut naammaginartumik akissutaasut.

Inussiarnersumik inuulluaqqusillunga



Steen Lyng

---